

PR Rejeita Espékula Desizaun Ba Proposta Alterasaun Lei Atividade Petrolífera

27/11/2018



Foto Media PR/Juliao Fernandes

Prezidente Repúblika, Francisco Guterres Lú Olo

DILI (TATOLI)—Prezidente Repúblika, Francisco Guterres Lú Olo, lakohi espékula nia desizaun veta ka promulga ba proposta alterasaun lei nú. 13/2005) kona-ba Atividade Petrolífera.

Xefe Estadu hateten lei fó kompeténsia ba nia atu estuda proposta alterasaun refere másimu durante loron 30 nia laran.

“Kuandu Prezidente simu deketu ka lei ruma hosi Parlamentu Nasionál, dentru loron 30 nia laran Prezidente desidi veta ka promulga. Portantu, ha’u sei estuda hela lei ida ne’e,” Lú Olo ba jornalista sira iha Parókia Motael, tersa ne’e, relaciona ho sosiedade sivil sira husu Prezidente Repúblika veta proposta alterasaun ba Lei Atividade Petrolíferu.

Governu husu alterasaun ba Lei Atividade Petrolífera ne’e iha 22 outubru liu-ba. Proposta alterasaun ne’e sei fó dalan ba Estadu atu participa iha Joint Venture (konsórsiu) ho partisipasaun asaun liu pursentu 20 iha explorasaun ba Kampu Greater Sunrise nomós hasai tiha kbiit ka kompeténsia Kámara Kontas atu halo vistu prévia ba kontratu sira ne’ebé iha ligasaun ba asuntu petrolífera.

Jornalista: Xisto Freitas